

Kua Origen?

Ora nos ta pensa tokante e origen di universo, mundu, bida, bida humano, èts., lógika ta obligá nos pa skohe entre dos pusibilidat: universo (i su contenido) semper a eksistí òf nan tabatin un komienso. Tin e dos pusibilidat ei so. Awendia sientífikonan ta konvensé ku universo no a eksistí semper.

Si universo tin un komienso, anto nos ta haña nos forsá pa skohe entre dos otro pusibilidat: universo a resultá for di un proseso ku te ainda ta funshoná òf e ta resultado di un proseso ku no ta funshoná awendia mas. No tin mas pusibilidat. Pues, por bisa ku nos tin ku skohe entre un *proceso natural ku kontinuá* òf un *proceso sobrenatural ku ya kaba a ser kompletá*. E palabra evolushon i kreashon ta deskribí e dos pusibilidat aki.

Si evolushon ta un proseso natural ku ta kontinuá, anto mester ta pusibel pa opservá e proseso aki tumando lugá awendia ainda. Ma echu ta ku NINGUN prueba ta eksistí ku evolushon ta sosodé aktualmente. Ningun astrónomo a yega di opservá un strea desaroyá for di hidrógeno. Ningun biólogo a dokumentá e evolushon di bida for di kímikonan. Ningun médiko a opservá hende desaroyá for di makaku. Maske sientífikonan a purba dupliká e proseso di evolushon miles di bes, nunca nan a logra.

Esaki no ta prueba konklusivamente ku evolushon no por a sosodé den pasado. Ma e ta okashoná un problema serio pa evolushonistanan. Siensia ta basá riba echunan ku hende por opservá. Debí ku evolushon nunca a ser opservá, un evolushonista onesto mester atmití ku EVOLUSHON NO POR TA SIENSIA.

Historia humano dokumentá tin kasi 5000 aña. Durante e sinku milenio, streanan a eksplotá, meteor i kometa a desintegrá, diferente spesi a bira ekstinto (pa averahe un kada dia), i eventualmente tur kos ta muri. Ma den tur historia ningun hende a yega di dokumentá evolushon tumando lugá. En kontraste tur kambio dokumentá ta bai den un direkshon KONTRARIO di evolushon.

Ademas, ningun fosil ta duna evidensia ku evolushon a yega di sosodé. Nunca a ser haña den barankanan figura di un bestia ku tabatin mitar pia i mitar hala, òf mitar skama i mitar pluma, òf wowo mitar desaroyá. Si evolushon ta bèrdat, miones di fosil asina mester eksistí.

Si no tin prueba ku evolushon ta sosodé awendia i si no tin evidensia ku evolushon a yega di sosodé den pasado, nos tin ku konkluí ku EVOLUSHON TA SOLAMENTE UN TEORIA IMAGINA.

Kiku ta keda di e otro alternativa pa ku e origen di universo, esta, un proseso sobrenatural ku ya kaba a ser kompletá? Kiku di kreashon?

Siensia no tin tur e kontestanan. Siensia no por bisa kon kreashon a sosodé, kuantu tempu el a dura, e òrdu di kreashon. Ma siensia si por dedusí ku tabatin un kreashon, i pues lógikamente mester tabatin un Kreadó. Debí ku El a krea bida i personalidatnan humano, nos por dedusí ku e Kreadó tambe ta un Persona bibu. I mirando e energia i e deseño kompliká di nos universo, nos por konkluí ku e Kreadó mester ta todopoderoso i sa tur kos.

Si t'asina nos Kreadó ta, sigur lo E tin e abilidadat pa revelá na hende algu tokante origen di e universo. Unda nos por haña e informashon aki? Tin hopi buki religioso, antiguo i moderno, ma nan no ta konta di e kreashon di universo. Nan ta kuminsá ku tempu, espasio, i kos material ya kaba eksistente i ta purba splika kon e sobrá ta eksistí. Ma tin tres religion ku ta kere den kreashon--islam, hudaismo, i kristianismo--i tur tres ta basa nan kreensia riba e mésun dokumento, e buki di Génesis. E buki bíbliko aki so ta konta KON kreashon a sosodé.

Génesis ta habri ku e palabranan, "Na prinsipio Dios a krea e shelunan i tera" i ta sigui ku mas detaye di kreashon. Bo por ker'é òf laga di ker'é. Bo por rechasá e relato aki manera ateonan ta hasi, bo por ridikulis'é manera evolushonistanan ta hasi, bo por alegoris'é manera algun religioso ta hasi. Ma bo no por kambia e fakto ku esaki ta Dios Su propio relato di kreashon, konfirmá pa Hesu-Kristu (Marko 10:6) ku tambe tabata presente na kreashon.